

Inatsisartut suleriaasianni § 37 naapertorlugu matumuuna apeqqutit Naalackersuisunut imaattoq saqqummiuppara:

Apeqqutit:

1. Ilumoorpa Najugaq Qimannagu Inunnik Isumaginninnermi Siunnersortinngorniat Ilinniartitaanerat august 2017-imiit aallartittusseq ilaannakuusumik ingerlanniarneqarmat?
2. Ilumoorpa Naalackersuisut Inunnik Isumaginninnermi Siunnersortinngorniat ilinniartitaanerat novemberimi 2017-imi ingerlassinnaangikkaat?
 - a. Tamanna aningaasassaaleqinermik pissuteqarpa?
3. Massakkorpiaq Inunnik Isumaginninnermi Siunnersortinngorniat 31-iusut Naalackersuisuniit naatsorsuutigineqarpat, tamarmik inunnik isumaginninnermi sulisooreersut, ilinniartitaanertik ingerlateqqissagaat novemberimi 2017-imi immikkoortortaq ingerlasinnaangippat?
4. Naalackersuisut aamma isumaqarpat, ilinniartitaanissaq novemberimi pisusseq unitsinneqarpat kingunerlussinnaassasoq allaat ilinniartut ilaat taamaatiinnartariaqarnerannik kinguneqarluni?
5. Naalackersuisut ilinniartunut kingunerluutissanik allanik sunik naatsorsuuteqarpat ilinniarnermi immikkoortortat taamaatittut / kinguartittut kinguneranik?

(Inatsisartuni ilaasortaq, Martha Lund Olsen, Siumut)

Tunngavilersuut:

Naalackersuisunut § 37-imut apeqquteqaatinnut nr. 162-imut akissutaat atuareerlugu – suli itinerusumik nassuiaateqaqqullugit apeqqutit nutaat akeqqussavakka.

Ukiut marluk matumap siorna ilinniartitaanermik nutaamik aallartittoqarpoq imatut atilimmik, *Najugaq Qimannagu Inunnik Isumaginninnermi Siunnersortinngorniat Ilinniartitaanerat*, tassanilu ilinniartut massakkorpiaq 31-iusut inunnik isumaginninnermi siunnersortinngorniarlutik atuarpud, atuarnertillu saniatigut sulisooreerlutik, pingaarnerusumik kommunini sullissisuullutik. Tamanna ersarissumik pitsaassutsikkut iluaqutaareersoq malunnarsivoq tassami inunnik isumaginninnikkut allaffissornikkut suliap qaffaallaataasimasoq takuneqarsinnaalereermat, tamannalu aamma ilinniarnermi naammassippata suli malunnaataanerussalluni.

Kommuneni sulisussanik amigaateqarujussuarternerat eqqarsaatiginerullugu ukiut marluk matumap siorna *Najugaq Qimannagu Inunnik Isumaginninnermi Siunnersortinngorniat Ilinniartitaanerat* aallartippoq, taamani Naalackersuisuusut isumaqarmata iliuusissatut pingaaruteqartut ilaattut iluaqutaasinnaamat kommuneni sullissisarnerup pitsanngorsarnissaa

eqqarsaatiginerullugu, minnerunngitsumik meeqqanik isumassuinerup pitsanngorsarnissaa pinerullugu.

Taamaamat ajusaarujussuarpunga paasilerakku Naalackersuisut aningaasanik naammalluartunik immikkoortiterisimanngimmata, allaat imatut kinguneqalerluni ilinniartitaanermi immikkoortortat pilersaarutaareeraluartut ingerlanneqarsinnaajunnaarmata.

Apeqquteqaatika ullut suliffiusut qulit iluanni akineqareernissaat kissaatigaara.